

Inatsisartut Suleriaasianni § 33, imm. 3. nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 3/2010-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut, kaammattuutit aalajangersagaq imatut oqaasertaqarpoq:

**Nunat Avannarliit Killiit Siunnersuisoqatigiiffiata Savalimmiuni naalakkersuisunut, Namminersorlutik Oqartussanut Islandimilu naalakkersuisunut siunnersuuteqarpoq Nunani Avannarlerni Killerni timmisartunik umiarsuarnillu angallannermi attaveqaatit pitsanngorsarnissaannut siunnersuusiortussamik suleqatigiissitaliamik pilersitsisoqassasoq, Nunat Avannarliit Atlantikumi Suleqatigiiffiat (NORA) sapinngisamik peqataatillugu.**

### **Nassuiaat**

Nunani avannarlerni immikkoortumi nassiussanik ilaasunillu angallassinermi niuernermi sullissinermilu isumaqatigiissutaasinnaasut assigiinngitsut suleqatigiissutiginerisa annertusarnissaat siunertaassaaq. Misissuinerit nalunaarusiallu pioreersut nunani avannarlerni immikkoortumi sulisoqarfiit assigiinngitsut suliareriigaat suleqatigiissitaliap sulinermini aallaavigilluarsinnaavai.

Tassunga atatillugu kissaatigineqarpoq Islandimi Vestfjordene Tunullu akornanni sullissinerup niurnerullu nunani avannarlerni immikkoortup ineriartortitsinnissaanut periarfissat immikkut isiginiarneqassasut.

Qallunaat naalagaaffianni naalagaaffeqatigiinnermi Savalimmiunut Kalaallillu Nunaannut namminersorluni oqartussaanermik aaqqissuussineq peqatigalugu Nunani Avannarlerni Killerni suleqatigiinneq ukiuni kingullerni annertuseriarujussuarnikuuvoq. Nunat Avannarliit Killiit Siunnersuisoqatigiiffiat 1985-imi pilersinneqarpoq, pingaarnerusutullu siunertaalluni Nunani Avannarlerni Killerni naalakkersuisut soqutigisat pingaaruteqartut pillugit isumasioqatigiittarnerisa suleqatigiittarnerisalu annertusarnissaat. Nunat Avannarliit Killiit suleqatigiinnerisa annertusarnissaanut tunngavissat pisariaqartut pingaarnerit tassaapput timmisartunik umiarsuarnillu angallannermi periarfissat. Tassunga assersuutit taasinnaavarput Islandip Savalimmiullu killeqanngitsumik niuersinnaaneq pillugu 2006-imi isumaqatigiissutaat tunngavigalugu Savalimmiut Islandimi peqqinnissaqarfimmik annertusiartortumik atuinera, taamaaliornikkullu nunat imminnut qaninneri atorluarneqarpoq.

Nunat Avannarliit Killiit akornanni sullissinermut, niueqatigiinnermut nassiussanillu assartuinnermi pisariaqartoq alla tassaavoq pitsaasumik ataveqatigiinnissaq, tamannalu takornariartitsisarnermut aamma atuuqpoq. 1995-imiilli Nunani Avannarlerni Killerni angallassisartut suleqatigiingaatsiartarput, tassani ilaatigut ataatsimoorullugu tuniniaasoqartarluni aammalu Islandip Kalaallillu Nunaata akornanni timmisartukkat attaveqaatit pitsanngortinneqarnerat ilaatigut Kalaallit Nunaanni takornariartitsisarnerup annertusineranik kinguneqarpoq. Nunani Avannarlerni Killerni timmisartuutiqatigiiffiit angalatitsiviillu akornanni annertunerujartortumik suleqatigiinneq ilutigalugu silaannakkut angallanneq pillugu Islandip Savalimmiunut Kalaallillu Nunaannut

isumaqatigiissutissatut pilersaarutaata kingunerisinnaava Savalimmiut, Islandip Kalaallillu Nunaata akornanni timmisartut umiarsuillu atorlugit sullissisoqalenera.

### **Islandimi Vestfjordene Tunulu**

Nunat imminnut qaninneri pissutigalugu pingaartumik Islandimi Vestfjordene Tunullu akornanni attaveqaqatigiittarnerup annertusarneqarnissaa soqutigineqartorujussuuvoq. Assersuutigalugu taaneqarsinnaavoq illoqarfik Ittoqqortoormiit Nuummur sanillillugu Ísafjörðurimut qaninnerujussuummat, Tunulu tassangaaniit nioqutissanik pilersorneqarsinnaavoq.

Nunat Avannarliit Killiit Siunnersuisoqatigiiffiata Savalimmiuni naalakkersuisunut, Namminersorlutik Oqartussanut Islandimilu naalakkersuisunut siunnersuuteqarpoq Nunat Avannarliit Killiit akornanni suleqatigiinneq pioreersoq suleqatigiinnerullu taassuma ineriartortinneqarnissaanik kissaateqarneq aallaavigalugit nalunaarusiat suliarineqareersut tunngavigalugit aammalu Nunani Avannarlerni Killerni silaannakkut immakkullu angallannermi attaveqaatit annertusarnissaanik siunnersuusiortussamik suleqatigiissitaliortoqassasoq, Nunat Avannarliit Atlantikumi Suleqatigiiffiat (NORA) peqataatinneqarsinnaalluni. Nunat Avannarliit Killiit Siunnersuisoqatigiiffiat isumaqarpoq Kalaallit Nunaanni aatsitassarsiornissamik pilersaarummut issittullu imartaani nassiussanik ilaasunillu immakkut annertusiartortumik angallassinermut ilaatigut tunngatillugu niuernerni sullissinernilu assigiinngitsuni suleqatigiinnermut ilanngullugu takornariartitsinermi, ilisimatusarnermi kulturikkullu ingerlatsinermi suleqatigiinnerit aallaavigalugit nunat siunissaat immikkut pingaartinneqartariaqartut.